

M098: Wessobrunner Glaube u. Beichte II

- 1,1 ich geloube an einen got . vater almehtigen der dâr
 1,2 schepfær ist . himeles . unde der erde . ich geloube an sînen
 1,3 einboren sun . unsern hêrren . Jesum Christum . ich geloube daz
 1,4 er entvangen wart . vone deme heiligen geiste .
 1,5 ich geloube . daz er geboren wart . vone mîner vrouwen
 1,6 sancte Marien . der êwigen megede . wârer got .
 1,7 wârer mennische . ich geloube daz er in dirre werlte
 1,8 was . als ein anderer mennische . âne sünde eine .
 1,9 ich geloube daz er gevangen wart . daz er gemarteret wart .
 1,10 daz er an daz kriuze genagelt wart . unde dâr an erstarp .
 1,11 nâch der mennischheit . niut nâch [der] goteheit . ich geloube
 1,12 daz er begraben wart . ich geloube . daz er ze helle vuor .
 1,13 unde dannen lôste . alle . die sînen willen getân hêten .
 1,14 ich geloube . daz er erstuont . an dem dritten tage .
 1,15 ich geloube . daz er ze himele vuor . an dem vierzigstem
 1,16 tage . nâch sîner urstende . unde dâ sitzet . ze der
 1,17 zesewen . sînes êwigen vater . ime ebenêwiger . ime
 1,18 ebengewaltiger . ich geloube . daz er dannen kûmftic ist .
- 2,1 ze teilen al mankünne . iegelîchen nâch sînen werken .
 2,2 ich geloube an den heiligen geist . ich geloube . daz die drî benenede
 2,3 des vaters . unde sunes . unde des heiligen geistes . ein wârer
 2,4 got ist . ich geloube ein kristenheit . heilige . allîche . botelîche .
 2,5 ich geloube die gemeinede aller gotes heiligen . obe ich sie gearne .
 2,6 ich geloube den antlâz . aller mîner sünden nâch wârer riuwe .
 2,7 ich geloube die urstende mînes vleisches . ich geloube den
 2,8 êwigen lîp . âmen . ditze ist der heilige geloube . der ein
 2,9 beschirmede iu sîn schol . wider dem tiuuele . unde widere
 2,10 allen sînen anevchten . nû quît diu heilige schrift . der
 2,11 geloube der sî tât . âne diu werc . die ze dem heiligen gelouben gestênt .
 2,12 swâr ir diu werc nû begangen habet . diu den heiligen gelouben
 2,13 an iu ertôtt haben . der verjehet dem almehtigen gote . unde
 2,14 ergetet iuch schuldige in sîne genâde . daz nâch wârer riuwe
 2,15 unde nâch wârem antlâze sô getâner werke . diu werc
 2,16 an iu ûf stênte werden . diu den heiligen gelouben
 2,17 an iu lebente machen . al nâch der geloube . sô
 2,18 ich verjehen hân . sô widersage ich dem tiuuele . unde
 2,19 allen sîn zierden . unde allen sîn werken . unde bejihe

2,20 dem almehtigen gote . mîner vrouwen sancte Mariên . mîneme
2,21 hêrren sancte Michael . unde allen gotes engelen . mîneme hêrren
2,22 sancte Johannes . unde allen gotes wîssagen . mîneme hêrren
2,23 sancte Pêtere . unde allen gotes boten . mîneme hêrren
2,24 sancte Stephan . unde allen gotes marterærn . mîneme hêrren
2,25 sancte Martin . unde allen gotes bîhtærn . mîner vrouwen
2,26 sancte Margarêten unde allen gotes megeden . [disen] [heiligen] unde allen

3,1 gotes heiligen . den verjihe ich . aller der sünden .
3,2 die ich ie getet . an danken . an Worten . an werken .
3,3 sider des tages . daz ich allrêreste gesünden mahte . unze
3,4 an disen hiutigen tac . ich bin schuldic worden . an spotte .
3,5 an lahter . an nîde . an hazze . an überæzene . an übertrunkene .
3,6 an liegenne . an swern . an meineiden . an
3,7 hôchverte . an unrehteme trûren . an unrehter vrôuwede .
3,8 an girischheit . an unkiusche . lîbes unde muotes . die heiligen
3,9 dietvasten . unde ander vasten . die mir
3,10 gesetzet sint . die ne behielt ich nie . sô ich von rehte
3,11 solte . die sunnentage . unde andere die tulttage .
3,12 die ich behalten solte . die ne gerte ich nie . mit der
3,13 vîre . mit den kirchgengen . mit dem opfere . mit
3,14 dem almuosene . sô ich von rehte solte . daz riuwet mich .
3,15 mîn sünde . die ne klagete ich nie . mit der innicheit .
3,16 mit der riuwe . sô ich von rehte solte . ouch die buoze .
3,17 die ich bestuont umbe mîne sünde . die ne geleiste ich
3,18 nie . sô ich von rehte solte . daz klage ich .
3,19 des übeles des ich nû geruort hân . unde
3,20 alles des übeles . daz got hier ze mir weiz .
3,21 des ergibe mich schuldigen . in sîne genâde . unde
3,22 in die genâde . aller sîner heiligen . unde in iuwer
3,23 genâde . unde bite iuch . daz ir mir antlâzes
3,24 wünschet . vone gote . vone sîner muoter .
3,25 vone allen sînen heiligen . misereatur . indulgentiam .